

Friday, June 19, 2026

Time - 2:30pm - 2:35pm

AKASHVANI AIZAWL
REGIONAL NEWS BULLETIN
(MIDDAY)



MP

Mizoram aiawh tur Rajya Sabha MP thar Pu Khiangte Laltluangkima Mizoram sorkar flagship programme hlawhtlinna chu a ngaih pawimawh ber tur anih thu a sawi.

Pu Laltluangkima chuan mipui tan theihtawp a chhuah dawn tih a sawi a, Mizoram sorkarin hmalakna lian tham leh hmachhawp a neih te a hlawhtlin ngei theih nan Delhi lama lo bawhzui chu a ngaih pawimawh a nih tur thu a sawi.

Pu Khiangte Laltluangkima hian Lok Sabha MP Richard Vanlalmangaiha ang bawkin a thutna tur a chiang sa tawh tih a sawi a, vote thlak hunah chuan issue mil zela vote an thlak tur thu a sawi bawk a ni.

Election Commission of India (ECI) remruatnain nimin khan Mizoram Legislative Assembly-a MLA 40 zinga MLA 36 te chuan Mizoram aiawh tur Rajya Sabha MP hi Mizoram Legislative Assembly Secretariat Annexe building-ah an thlang a, tlai dar 5 khan vote tla te hi chhiar nghal a ni.

Mizoram Rajya Sabha MP thlan thar Pu Khiangte Laltluangkima hian vote 26 hmu in, a khingpui MNF Candidate Zothansangi Hmar chuan vote 10 a hmu thung a ni. Puan tawh angin tun tum MP inthlanah hian Mizoram BJP leh Congress te chuan vote an thlak lo a, damlohna avangin ZPM MLA Pu W. Chhuanawma chuan vote a thlak thei lo bawk a ni.



MPCC

Mizoram Pradesh Congress Committee MPCC thupuangtu Dr.Lallianchhungan ZPM sorkar chuan Mipuite rawk dan chikimin rawk an tum ni berin a lang a ti

Vawiina MPCC chhung inkhawm Aizawl Congress Bhavan-a neihah thu sawiin Pu Lallianchhunga chuan ZPM sorkarin Mizo App hman tur tia Taxi ho an tukluih chu engdang ni loin, mipuite atanga chhiah an khawwna hmanrua tur a ni a ti a. India ram khawpui lian UBER leh OLA hmannaah Taxi neitute'n Registration Fee cheng khatmah an chawi loh lain, Mizoramah chuan Registration Fee cheng 500 an chawi dawn a. Taxi hmangtute'n chhiah an pekna tur atana Mizo App hi siam a ni ber a ti a ni.

ZPM sorkar chu leiba tipung nasa tur zawngin, a tlaran zawngin an khawsa a. State nih hnuah Budget aiin leiba a tam pah ta tiin Pu Lallianchhunga chuan a sawi a, kumin 2026-2027 Mizoram Budget chu cheng vbch 17,076 a nih lain, leiba chu cheng vbch 19,085 a ni dawn a ni a ti a. Mizoram chu leiba thangah an tantir a ni ringawt a. Sorkar leh tur tan pawh buaipui tham leiba ZPM sorkar hian a hnutchhiah hman dawn a, ZPM ENCHHIN chu a paw hle a ni a ti .

Congress Bhavan a Political Session hi MPCC Gen.Secy Pu C.Dothersangan a kaihrui a ni.



EXCISE

Excise & Narcotics Department-in hriselna kaihnawih avanga IMFL kawh leh zu in phalna 'Red Card' an pek chhuah turah mi 90-in dilna form an la chhuak tawh a, dilna theh lut an la awm lo thung.

Akashvani Aizawl zawhna chhangin, END-a thawkte chuan Red Card hmanga IMFL hralh chhuak tur hian engkim peih fel a ni tawh tih sawiin, Red Card dilna tur form lakchhuahna turin Commissionerate office ground floor-ah desk siam a ni an ti a, tun thla June ni 3 atang khan Red Card dilna form an pe chhuak tan tawh a, vawiin June ni 19 thleng hian mi 90 hnenah pekchhuah a ni tawh tih an sawi.

Red Card nei tur hian doctor te'n damdawi atana an chawhna lehkha an neih hnuah an awmna District Medical Superintendent ten an chawhna chhante en fiahin, phalna an pekte hnenah chauh Red Card hi pek an ni dawn a. Red Card hi kum khatah Rs. 5,000 man zel a ni dawn a, Aizawla Excise pisa-ah END chuan Departmental Store siamin, zu an man, Court-in a tihfel tawhte chu Red Card neite tana hralh chhuah a ni dawn a. Zu chu a man pangngai aia zaa 75-a tlawmin hralh a ni dawn a ni.

Hei bakah hian END-a thawkte chuan Mizorama kuthnathawktute hlawkna chu sorkarin a duh ber avangin, Hnahlan leh Champhai winery atanga siamchhuah Grape wine zuar turin phalna bik a ngai tawh lova, tute pawhin an zuar thei tawh tih an sawi bawk a ni.



PRESIDENT

President Droupadi Murmu chuan kum 2047 hma in sickel cell disease chu umbo theih an inbeisei tih a sawi.

Tribal te zinga hluar bik, thisen atanga inkaichhawn theih sickle cell disease umbo tur hian a chanchin inhrilh uar a ngai tih President chuan vawiina Madhya Pradesh a World Sickle Cell Day puala hun hman naah a sawi a, ramchhunga state zawng zawng te chu tan la thar tura chahin, a damdawi a awm a, a umbo theih avangin he natna tribal zinga hluar bik hi umbo ngei turin hmalak ni se a ti a ni.



NATIONAL READING DAY

Vawiin hi National Reading Day a ni a, Kerala a Library Movement puipa Puthuvayil Narayana Panicker a pualin he ni hi hman a ni.

Kum 1996 June 19 atang khan hman tan a ni a, lekhachhiar uar tur leh ziak leh chhiar thiam kawnga hmalakna tur a ni.

